

UAPUSH MAK NANIMISSU

Etuat Rich

Papamipanu ne Nanimissu, nenua utishkuema iteu :

— Nika papamipan.

— Eshe, itiku.

Ek^u anitshenat auassat nishtishuat, napessat anitshenat kassinu.

— Ne ma tshukumishinan, iteu, tan eshinakussit, ka-uauashteiapishua.

— Nipa tshi a eka ishinakushin ? iteu. Neme pemashiani anite napekuianit, nete ma nikapitenuti, nete ma eitapiani katak^u, ua nishtunamani anite Akami-assit ua ishpaniani, eukuan uet mamakapian, iteu.

— Eshe, itiku.

Nenua kutaka itiku :

— Tshukumishinan ma ne eshinakushit, ka-tassituneshua.

— Nipa tshi a eka ishinakushin ? iteu. Neme uekashkukashuian anitshenat mikunat anat, niananishtukataman, ashtush eukuan an pepishtishut ne, mikunat anat nititishukuat, ne ka-nitassituneshinaua, iteu.

— Eshe, itiku.

Uaushinueuat nenua ukumishuaua.

— Nenu ma, tshukumishinan, iteu ne auass, utukaia nenua shuk^u ka-kakanuashkushinuani.

— Tshipa tshi a eka kakanuashkuana nitukaia ? iteu. Netutamani uetshimau-aiminanuti, eukuan an uet kakanuatutsheian, uetshimau-aiminanuti an.

Tsheshimikut ek^u. Ututamishtikuaneueu. Nishtinua, kassinu nipaieu nenua utushimisha. Nipaieu nenua kassinu. Katshi nipaiat ekue manitennuepitat, utenninu manipitamueu ekue tshiuetatat. Metushtueik nenua nete ishketet. Passikatenua nenua.

— Ushteshimau-utennish ! iteu.

Minuat kutakanu ekue mitushtueik. Iteu :

— Ne tashtuitshipaniakan !

Minuat kutakanu ekue passikatenit. Minuat ekue mitushtueik kutakanu, nenua auassa.

— Eukuan shinipatshipitakan ! iteu.

Ek^u itiku nenua umisha :

— Tshakuan an ne etutamin, tshakuan etutamin ?

— Apu tshakuan, iteu.

— Tanite nekanat nikussat etututau ? itiku.

— Eukuannua nenua ka-nipassipassikashamuanaua utenniuaua, iteu.

Ek^u mianiti nenua umisha.

— Tshekuannu nenu ek^u uet nipaitau ? itiku.

— Tanite nuaushinakuat, ek^u nepaikau, iteu.

Tekushinniti nenua unapema, ek^u mau ne ishkuueu.

— Tan etin ? iteu.

— Nipaieshapan nenua tshikussinana, iteu, ne Uapush nipaieshapan nanani tshikussinana.

— Tshinanu ma e tshishenniuia^u, iteu ne Nanimissu.

— Eshe, iteu ne Uapush.

— Unui, iteu.

Uenuit ek^u Uapush.

— Nete api ashinit, itiku, ekute anite api.

Ek^u nekamut ne Nanimissu. Pietuetaminiti shash nanimissua tapue.

Mishta-mitshetuetaminua nanimissua. Ekue nataukut nanimissua ekue pikupitikut ne Uapush. « Tshima eka pashtipanit peik^u enuet nissishik^u... », itenitam^u. Tshissenitam^u tshe pikupanit shash. « Tshima peik^u eka pashtipanit nissishik^u... », itenitam^u. Tapue miakumikut nanimissua, nutim pikupitiku. Ma !

— Eukuan an ka ui ninipaiat tshikussinana, iteu ne Nanimissu. Shash nana ninipaiou. Nutim anite piuashu. Nasht apu tshissenitakushit. Eukuan ma an, apu tshika tshi nita minuat nutshikatak^u, iteu.

Ek^u nenishtuimakannit nenu uiau : kau nenu ka ishinakushit eukuan eshinakushit ne Uapush. Patutshet. Tshitapameu ne Nanimissu : eukuani nenua.

— Aaa, kuessipan tshe tutatan ka tutuin, iteu. Ka apian nete, api ashinit !

Ek^u iteu ne Nanimissu :

— Tshipa tshi a tshi tutun nene ka tutatan ?

Ekue itutet anite, ashinit apu. Nekamut Uapush. Ek^u piapatshishinniti mishkumia. Manipitam^u ussishik^u peik^u, uiepinak anite ishlimit.

— Ume tshipa iashpishtin ! iteu nenua mishkumia.

Ek^u piapatshishinniti, mishta-mamishishtinua mishkumia. Ekue shikauat,
ui upau ne Nanimissu, ekue shikaukut miam anite tauku nenua mishkumia. Ekue
papakaukut, ui upaua, ekue papakaukut nenua mishkumia.

